

PERBANDINGAN KALKULATOR ZAKAT PENDAPATAN NEGERI PULAU PINANG, PAHANG DAN SELANGOR: KAJIAN ANALISA KANDUNGAN LAMAN WEB

‘Imaaduddin Abdul Halim¹, *Saiful Nizam Warris², Muhammad Che Saad³, Hisyam Mohd Radzi⁴,
Dahlan Abdullah⁵ and Ahmad Zia Ul-Saufie⁶
imaaduddin@uitm.edu.my¹, *saifulwar@uitm.edu.my², muhammad247@uitm.edu.my³,
hisyammr@uitm.edu.my⁴, dahla707@uitm.edu.my⁵, ahmadzia101@uitm.edu.my⁶

^{1,3,4} Akademik Pengajian Islam Kontemporari (ACIS),

² Jabatan Sains Komputer & Matematik (JSKM),

⁵Fakulti Pengurusan Hotel dan Pelancongan (FPHP),
Universiti Teknologi MARA Cawangan Pulau Pinang, Malaysia

⁶Fakulti Sains Komputer & Matematik (FSKM),
Universiti Teknologi MARA, 40450 Shah Alam, Selangor, Malaysia

ABSTRAK

Kalkulator zakat pendapatan merupakan instrument yang diguna pakai oleh institusi pengurusan zakat negeri bagi menentukan samada seseorang individu layak membayar zakat atau tidak. Kalkulator ini dibangunkan berasaskan kepada atas talian bagi memudahkan pembayar zakat capai kepada kalkulator tersebut. Satu kajian analisa kandungan laman web telah dilakukan bagi membandingkan kalkulator pengiraan yang diguna pakai di Zakat Pulau Pinang (ZPP), Pusat Kutipan Zakat Pahang (PKZ Pahang) dan Lembaga Zakat Selangor (LZS). Antara perbandingan yang akan diambil kira ialah, item yang terdapat di bawah kategori pendapatan, jenis kategori dan item untuk tolakan, nilai tolakan mengikut item yang dibenarkan dan juga keunikan yang terdapat pada kalkulator zakat pendapatan.

Keywords: *kalkulator zakat, zakat pendapatan*

Pengenalan

Pusat kutipan zakat bagi setiap negeri mempunyai kalkulator zakat pendapatan yang tersendiri mengikut kepada takrifan masing-masing. Antara pusat zakat negeri yang menyediakan kalkulator pengiraan zakat Pendapatan ialah Zakat Pulau Pinang (ZPP), Pusat Kutipan Zakat Pahang (PKZ Pahang) dan Lembaga Zakat Selangor (LZS).

Tujuan kalkulator ini adalah untuk menyenangkan pembayar zakat di negeri tersebut menentukan sama ada mereka layak untuk membayar zakat pendapatan atau tidak. Jika layak, kalkulator ini juga akan memberi nilai bayaran zakat pendapatan yang perlu dibayar setiap bulan.

Oleh itu, satu kajian analisa kandungan laman web diadakan bagi membandingkan kalkulator yang digunakan pakai di ZPP, PKZ Pahang dan LZS memandangkan kalkulator zakat Pendapatan boleh dicapai melalui laman web masing-masing.

Objektif kajian adalah seperti berikut:

- i. Menentukan item pendapatan yang diambil kira
- ii. Menentukan kategori, item dan nilai bagi tolakan
- iii. Mengenalpasti keunikan pada kalkulator pengiraan zakat pendapatan

Kajian Kesusasteraan

Zakat

Perkataan zakat atau *al-Zakah* dalam bahasa Arab mengandungi pelbagai maksud. Zakat bermaksud suci, rahmat, berkembang, subur, pintar, bertambah, baik, damai, sedekah dan terpuji. Akan tetapi, makna yang sering digunakan bagi perkataan ini lebih merujuk kepada pengeluaran sejumlah harta tertentu. Zakat dari istilah syarak pula ialah hak yang wajib dikeluarkan daripada harta. Menurut mazhab Maliki, zakat didefinisikan sebagai ‘mengeluarkan sebahagian daripada harta yang khusus yang telah mencapai had kuantiti yang mewajibkan zakat kepada orang yang berhak menerimanya (mustahiq) dengan syarat pemilikan itu penuh dan mencapai haul (setahun), bukan tambang dan bukan pertanian. Para fukaha mazhab Hanafi mendefinisikan zakat sebagai menjadikan sebahagian harta yang khusus daripada harta yang khusus sebagai milik orang yang khusus, yang ditentukan oleh syarak kerana Allah S.W.T." Ungkapan "menjadikan sebahagian harta ... sebagai milik" (tamlik) dalam definisi di atas bermaksud untuk penghindaran daripada ibahah (kezinaan). Dengan demikian, seandainya seseorang memberi makan kepada seorang anak yatim dengan niat mengeluarkan zakat, maka zakat dengan cara tersebut dianggap tidak sah. Demikian juga jika makanan itu diserahkan kepada anak yatim tersebut atau memberi pakaian kepadanya walaupun syarat pemilikan harta itu dikaitkan kepadanya iaitu orang yang menerimanya. Harta yang diberikan itu hanya dihukum sebagai nafkah kepada anak yatim tersebut kerana syarat-syarat sebagai zakat tidak lengkap. Dalam mazhab Syafi'e, zakat didefinisikan sebagai satu ungkapan untuk pengeluaran harta tertentu secara wajib dan diagihkan kepada golongan tertentu apabila cukup syarat-syarat wajibnya. Mazhab Hanbali pula mendefinisikan zakat sebagai hak yang wajib dikeluarkan daripada harta yang khusus untuk kelompok yang khusus juga (Mohd Uda Kasim (2004).

Terdapat tiga makna zakat yang berbeza daripada segi linguistik, teologi atau undang-undang. Sudut linguistiknya, zakat bermakna pembersihan atau penyucian sesuatu dari kotoran dan najis. Seterusnya dari segi teologi pula ialah zakat membawa penyucian rohani iaitu cara terhasilnya memberi zakat dan terakhirnya dari sudut undang-undangnya adalah zakat bermaksud pemberian pemilikan harta khusus untuk khusus kepada individu tertentu di bawah keadaan tertentu (Siti Norhidayah & Hairunnizam , 2017).

Selain itu, zakat berperanan sebagai mekanisme kewangan yang berfungsi sebagai satu bentuk jaminan keselamatan sosial bagi mereka yang berada dalam kemiskinan dan memerlukan. Di samping itu, ia juga berperanan dalam menjana pertumbuhan ekonomi yang seimbang melalui agihan semula kekayaan dan masyarakat (Nur Alisha & Hairunnizam, 2018).

Zakat pendapatan

Zakat gaji dalam sistem pengurusan kewangan Islam dikenal sebagai *ata'* ('*utiyat*), iaitu apa-apa upah yang diterima oleh seseorang dari pada majikan sebagai balasan perkhidmatan (kerja) yang dibenarkan oleh syarak. Manakala zakat pendapatan dikenal dengan istilah *al-Mal al-Mustafad* yang bermaksud apa-apa ganjaran yang diterima oleh seseorang daripada mana-mana pihak sebagai hasil kepakaran (kerja) yang dibenarkan oleh syarak. Sejak akhir-akhir ini, kedua-dua bentuk zakat di atas mengguna pakai istilah *al-Mal al-Mustafad* yang bermaksud "apa-apa upahan, ganjaran, habuan atau mana-mana sebutan yang semakna dengan pendapatan daripada majikan awam atau swasta mahupun pelanggan secara tetap, kontrak, persaraan atau kematian dengan syarat pendapatan itu terkeluar dari pada transaksi perniagaan, pelaburan atau pembiakan ternakan." Zakat *al-Mal al-Mustafad* merupakan satu sumber zakat baru yang diperkenalkan secara meluas oleh Prof. Dr. Yusuf al-Qaradawi melalui buku beliau yang bertajuk *Fiqh al-Zakat Dirāsah Mugaranah li-Ahkamihā wa Falsafatihā fi Daw' al-Qur'an wa al-Sunnah* (Mujaini Tarimin, 2006).

Zakat pendapatan merupakan antara topik perbincangan yang hangat pada masa kini. Harta perolehan terbahagi kepada tiga.

1. Harta pendapatan, gaji, dan upah

Segala pendapatan yang diperoleh seseorang daripada majikannya hasil daripada usaha atau pekerjaan yang dilakukan untuk majikannya sama ada semasa berkhidmat, selepas berkhidmat atau selepas kematiannya (pencen terbitan). Maksud pendapatan di sini boleh dirujuk kepada pendapatan bulanan atau upah tertentu (Shofian & Amir Husin, 2002). Contohnya gaji, upah, bonus, pencen, insentif, gratuiti dan lain-lain.

2. Harta hasil pekerjaan bebas

Segala pendapatan yang diperoleh seseorang hasil daripada pekerjaan yang dilakukan atas usaha sendiri tanpa ada kaitan dengan pihak lain dalam bentuk kerja bebas atau perkhidmatan professional. Contohnya doktor, peguam, kontraktor, hasil komisen, arkitek dan royalti hakcipta serta lain-lain.

3. Harta hasil aset tetap

Harta yang tetap induknya tetapi boleh berkembang dengan mendatangkan pendapatan melalui sewaan atau jualan hasilnya. Contohnya hasil sewaan rumah atau kenderaan, hasil ladang getah, sawit, pertanian selain padi, hasil ternakan seperti telur, susu dan lain-lain.

Berdasarkan penelitian, terdapat beberapa kajian yang ditemui berkenaan dengan kalkulator zakat. Antaranya ialah kajian berkenaan aplikasi konsep khultah dalam pengiraan zakat di Malaysia yang merangkumi cabaran dan penyelesaiannya. Khultah secara umumnya merujuk kepada harta-harta yang dimiliki oleh beberapa pemilik yang dihimpunkan sehingga mencukupkan kadar nisab zakat. Khultah juga bermaksud Khulṭah bermaksud aset-aset yang dimiliki oleh beberapa orang pemilik yang disimpan di tempat yang sama, dan segala pengurusan berkaitan dengannya diuruskan oleh satu pihak yang telah dilantik oleh pemilik-pemilik harta tersebut. Antara isu yang dikemukakan ialah khultah diamalkan di Tabung Haji dan syarikat perniagaan sahaja. Terdapat ketidakseragaman terutama bagi zakat ke atas akaun-akaun simpanan di bank-bank, dana-dana dan instrumen pelaburan semasa. Seterusnya isu berkenaan mencampurkan harta dari beberapa akaun untuk mencukupkan kadar zakat. Selain itu antara halangannya ialah wujud akaun berbeza dalam tempoh waktu ia dibuka disamping jualan di samping jumlah simpanan semasa ia dibuka tidak mencapai niṣāb . Cara pembayaran tidak jelas dan pemilik akaun tidak tertakluk kepada zakat juga menjadi halangan dalam mengimplementasikan kiraan zakat berdasarkan khultah (Ahmad Zikrullah & Ridzwan Ahmad, 2017).

Selain itu, terdapat kajian berkenaan sorotan Perbezaan had kifayah perbelanjaan keperluan asasi dan kesannya dalam pengiraan zakat pendapatan. Kajian ini telah menganalisis perbezaan jumlah bayaran zakat pendapatan individu berdasarkan had perbelanjaan keperluan asasi hidup yang ditetapkan dalam pengiraan zakat pendapatan. Pengiraan zakat pendapatan dengan andaian pendapatan dan perbelanjaan secara simulasi melalui kalkulator zakat atas talian dilaksanakan. Dapatan kajian ini mendapati perbelanjaan keperluan asas menunjukkan wujud persamaan dan perbezaan berkaitan jenis dan kadar digunakan. Dapatan daripada kajian ini menunjukkan bahawa perbezaan jenis PKA khususnya antara negeri memerlukan penilaian semula (Fidlizan Muhammmad et. al).

Seterusnya kajian Nur Afiqah Mat Tajudin et. Al (2021) adalah berkenaan tahap pengetahuan berkaitan item-item dalam pengiraan jumlah pendapatan berzakat dalam kalangan penjawat awam di negeri Perak. Terdapat empat item pendapatan yang dikaji iaitu melibatkan gaji dan elaun tetap bulanan, tunggakan gaji dan bonus. Dapatan kajian mendapati tahap pengetahuan responden berkaitan konsep asas zakat secara umum dan khusus adalah sangat tinggi. Namun analisis item mendapati item tunggakan gaji dan bonus berada pada tahap kurang diketahui oleh penjawat awam di Perak.

Latar belakang Zakat Pulau Pinang

Zakat Pulau Pinang secara rasminya memulakan operasi pada 27 Disember 1994 yang berpusat di Taman Selat, Butterworth. Pada awal penubuhannya terdapat dua lagi cawangan kaunter perkhidmatan zakat iaitu di Jabatan Agama Islam Pulau Pinang (JAIPP) dan di kompleks Bukit Mertajam. Pada 3 Januari 2005, Zakat Pulau Pinang berjaya memiliki bangunan sendiri di Bandar Perda, Bukit Mertajam di samping mempunyai enam cawangan perkhidmatan zakat di Nibong Tebal, Bayan Baru, Balik Pulau, Kepala Batas, Lebuh Buckingham dan Ayer Itam. Objektif utama penubuhan ZPP antara adalah meningkatkan kutipan zakat negeri Pulau Pinang, memperkenalkan sistem pungutan zakat yang lebih sistematik melalui operasi berkomputer dan menyediakan kemudahan membayar dan mengagihkan wang zakat dengan lebih berkesan dan adil agar pembayar zakat dan umat Islam tidak dizalimi seterusnya menambahkan keyakinan kepada institusi zakat (Zakat Pulau Pinang, t.t) .

Latar belakang Pusat Kutipan Zakat Pahang

Pusat Kutipan Zakat Pahang ditubuhkan pada 16 September 1995 dan beroperasi secara rasmi pada 2 Januari 1996 dan ketika itu terdapat 9 orang kakitangan. Objektif penubuhan PKZ adalah untuk meningkatkan kutipan zakat di negeri Pahang yang bermula sejak tahun 1983 oleh Majlis Ugama Islam Dan Adat Resam Melayu Pahang (MUIP) dan Jabatan Agama Islam Pahang (JAIP). Pada awalnya MUIP telah melantik sebuah badan swasta iaitu Azzakah Sdn Bhd (AZSB) untuk menguruskan kutipan zakat negeri. Tahun 2000 menyaksikan MUIP mengambil alih PKZ Pahang sepenuhnya sehingga sekarang. Selain itu, antara objektif penubuhannya juga adalah memberi penerangan dan maklumat berkenaan zakat harta secara berkesan dengan menggunakan kaedah terkini. Seterusnya menawarkan pelbagai kemudahan dalam pembayaran zakat di samping mengadakan kajian dan pembangunan dalam urusan zakat harta di negeri Pahang Darul Makmur (Pusat Kutipan Zakat Pahang, t.t).

Latar belakang Lembaga Zakat Selangor

Lembaga Zakat Selangor berada di bawah Majlis Agama Islam Selangor (MAIS). Ia telah ditubuhkan 20 tahun lalu. Sepanjang tempoh dua dekad penubuhannya, LZS berjaya meningkatkan momentum kecemerlangannya sebagai institusi zakat yang disegani dengan konsisten mempergiatkan gerak kerja dakwah untuk memastikan masyarakat mendapat pendedahan untuk menunaikan rukun Islam ini. Pengagihan zakat juga ditambah baik secara menyeluruh dan berkesan kepada lapan asnaf, Ini termasuklah melibatkan lima program pembangunan utama asnaf iaitu program pembangunan sosial, ekonomi, insan, pendidikan dan pembangunan institusi agama. Melalui motto 'Meneraju Perubahan', LZS (MAIS) sentiasa berusaha menawarkan perkhidmatan terbaik kepada para pelanggannya sama ada melibatkan pembayar dan penerima zakat. Ketika ini dengan tenaga kerja melebihi 400 orang staf dan

mempunyai 25 cawangan seluruh seluruh Selangor, LZS konsisten menjalankan amanah sebagai amil dan amiin yang mempunyai integriti integriti, jujur dan telus dalam melaksanakan tanggungjawabnya (Lembaga Zakat Selangor, t.t).

Metodologi Kajian

Kajian ini menggunakan metodologi kajian kandungan atas talian dengan melayari laman web pusat zakat negeri dan memfokus kepada kalkulator zakat pendapatan. Setiap kategori dan item yang diguna pakai oleh setiap kalkulator akan dikenal pasti dan akan membuat perbandingan. Selain itu, keunikan setiap kalkulator juga akan dikenal pasti. Kalkulator yang dipilih untuk dibuat perbandingan ialah Zakat Pulau Pinang, Kutipan Zakat Pahang dan Lembaga Zakat Selangor.

Hasil Kajian

Hasil kajian untuk kategori pendapatan adalah seperti ditunjukkan dalam jadual 1.

Jadual 1: Item yang terdapat di Kategori Pendapatan

Item	ZPP	PKZ Pahang	LZS
Pendapatan Penggajian	/	/	/
Pendapatan dari Elaun	/	/	/
Pendapatan dari Elaun Lebih Masa	/	/	/
Pendapatan Hasil Bebas / Profesional	X	/	/
Pendapatan Hasil Aset Tetap	X	/	/
Pendapatan Hasil Pemberian atau Sumbangan	X	X	/

Bagi tolakan ia boleh di pecahkan kepada tolakan had kifayah isi rumah (Jadual 2) dan had kifayah bersyarat/tambahan (Jadual 3). Hasil kajian adalah seperti berikut:

Jadual 2: Tolakan – Had Kifayah Isi Rumah

Item	ZPP	PKZ Pahang	LZS
Diri Sendiri / Ketua Keluarga	9000	14400	12936
Pasangan Tidak Bekerja (per individu)	3000	3000	X
Pasangan Bekerja (per individu)	3000	3000	X
Bilangan Anak (per individu)	1000	X	X
Dewasa Bekerja 18 tahun ke atas (per individu)	X	X	4848

*LZS – termasuk isteri

Dewasa Tidak Bekerja 18 tahun ke atas (per individu)	X	X	2172
*LZS – termasuk isteri			
Anak IPT (per individu)	X	4200	7104
Anak 7 tahun ke atas (per individu)	X	2400	4008
Anak 6 tahun ke bawah (per individu)	X	3600	1740

Jadual 3: Tolakan – Had Kifayah Bersyarat/Tambahan

Item	ZPP	PKZ Pahang	LZS
Nafkah untuk Ibu Bapa	/	Terhad 4200	X
Potongan KWSP	/	/	11%
Caruman Tabung Haji	/	/	/
Penjagaan Kesihatan Sakit Kronik (Isi Rumah dan Selain isi Rumah)	X	Terhad 2400	2664
Anak OKU	X	X	2668
Kos Penjagaan Anak (Nursery)	X	X	3480

Hasil kajian mengenai keunikan kalkulator seperti di senaraikan di jadual 4.

Jadual 4: Keunikan Kalkulator

Intitusti	Keunikan
ZPP	Mudah dan ringkas Jumlah tolakan berasaskan kepada jumlah Lembaga Hasil Dalam Negeri.
PKZ Pahang	Suami dan isteri boleh menentukan jumlah bilangan anak mengikut diri masing-masing. Jumlah tolakan berasaskan kepada penyelidikan had kifayah muzzaki.
LZS	Kos penjagaan anak di nursery di ambil kira. Anak OKU Jumlah tolakan berasaskan kepada penyelidikan had kifayah asnaf.

Kesimpulan

Kesimpulan daripada perbandingan mendapati, kategori untuk pengiraan zakat pendapatan adalah berlainan mengikut negeri. Jumlah yang diberi tolakan juga berbeza. Dari segi kategori pendapatan, LZS mempunyai item pendapatan yang lebih banyak berbanding dengan ZPP dan PKZ Pahang. Bagi bahagian tolakan, di ZPP nilai tolakan untuk setiap kategori adalah berasaskan kepada LHDN, manakala, PKZ Pahang pula berasaskan kepada penyelidikan had kifayah muzzaki dan LZS berasaskan kepada had kifayah asnaf.

LZS juga mengambil kira penjagaan anak OKU dan penjagaan anak di rumah pengasuh yang tidak terdapat di ZPP dan PKZ Pahang. LZS juga meletakkan kategori pasangan di dalam kategori dewasa 18 tahun bekerja dan dewasa 18 tahun tidak bekerja. ZPP pula hanya mempunyai 1 kategori anak manakala PKZ Pahang dan LZS mengkategorikan anak kepada 3 kategori iaitu, Anak IPT, Anak 7 tahun ke atas dan anak 6 tahun dan ke bawah.

Cadangan masa hadapan ialah supaya setiap negeri mempunyai kalkulator zakat yang sama supaya dapat memudahkan pengiraan zakat pendapatan walaupun nilai tolakan yang berlainan kerana ia mengikut kos kehidupan setempat. Inisiatif ini dapat membantu menyeragamkan kategori dan item bagi pendapatan dan tolakan.

Rujukan:

- Ahmad, S. & Md Nor, A. H. (2002). *Zakat membangun ummah*. Kuala Lumpur: Utusan Publications & Distributors Sdn Bhd.
- Hamzah, S. N. & Wahid, H. (2017). Penentuan had kifayah zakat: satu cadangan dimensi penentuan yang baru. (edit. Wahid. H. & Mohd Noor, M. A.). *Pengurusan Zakat di Malaysia: Satu pendekatan analisis gelagat*. Bangi: Universiti Kebangsaan Malaysia.
- Hussin, M. Y. M, Shaarani, A. Z. M. & Awang, S. A. (2021). Analisis tahap pengetahuan penjawat awam di perak terhadap item-item dalam pengiraan jumlah pendapatan berzakat. *Jurnal Sains Humanika*, 13(2). 1-5. <https://doi.org/10.11113/sh.v13n2.1760>.
- Ismail, N. A. M. M. & Wahid. H. (2018). Pola perbelanjaan dan cadangan penentuan nilai had kifayah mahasiswa institusi pengajian tinggi: Kajian terhadap asnaf miskin di Universiti Kebangsaan Malaysia. (edit. Wahid. H. & Mohd Noor, M. A.). *Pengurusan Zakat di Malaysia. Isu dan cabaran kontemporari*. Bangi: Universiti Kebangsaan Malaysia.
- Kasim, M. U. (2004). *Zakat teori, kutipan dan agihan*. Kuala Lumpur: Utusan Publications & Distributors Sdn Bhd.
- Lembaga Zakat Selangor (t.t). *Sejarah LZS*. Diakses daripada <https://www.zakatselangor.com.my/info-lzs/sejarah-lzs/#>
- Muhammad, F., Awang, S. A, Hussin, M.Y.M. & Mohamed, A. M. T (2017). Sorotan perbezaan had kifayah perbelanjaan keperluan asasi dan kesannya dalam pengiraan zakat pendapatan. *Jurnal Akademika*, 87(2). 89-103. <https://doi.org/10.17576/akad-2017-8702-07>.

Pusat Kutipan Zakat Pahang (t.t). *Latar belakang PKZP*. Diakses daripada (<https://www.zakatpahang.my/info-pkz/profil>).

Shaarani, A. Z. M. & Ahmad R. (2017). Aplikasi konsep khultah dalam pengiraan zakat di Malaysia: analisis isu dan cabaran penyelesaiannya. *Jurnal Syariah, Jil 25(2)*. (pp. 187-216).

Tarimin, M. (2006). *Zakat menuju pengurusan profesional*. Kuala Lumpur: Utusan Publications & Distributors Sdn Bhd.

Zakat Pulau Pinang (t.t). *Sejarah penubuhan zakat Pulau Pinang*. Diakses daripada (<https://v2.zakatpenang.com/sejarah-penubuhan/>).